

ԱՇՈՏ ՏԻԳՐԱՆԻ ԲԱՂԴԱՍԱՐՅԱՆ

1977 թվի օգոստոսի 28-ին հանկարծամահ եղավ՝ Հայկական ՍՍՀ գիտությունների ակադեմիայի կենդանաբանության ինստիտուտի դիրեկտորի տեղակալ գիտական գծով, ակադալոգիայի լաբորատորիայի վարիչ, գիտության այդ մասնաճյուղի հիմնադիրներից մեկը Հայաստանում, կենսաբանական գիտությունների թեկնածու Աշոտ Տիգրանի Բաղդասարյանը:

Ա. Տ. Բաղդասարյանը ծնվել է Լեռնային Ղարաբաղի Մարտունու շրջանի Ճարտար գյուղում, 1919 թ., գյուղացու ընտանիքում: Նա սկզբնական կրթությունը ստացել է գյուղի ոչ լրիվ միջնակարգ դպրոցում, ապա ընդունվել և սովորել է Շուշիի մանկավարժական բանֆակտում, որը և հաջողությամբ ավարտել է 1937 թ.: 1938 թվականին Ա. Տ. Բաղդասարյանն ընդունվել է Երևանի պետական համալսարանի կենսաբանական ֆակուլտետը: Հայրենական մեծ պատերազմի ահեղ օրերին՝ 1941-ին, շատ ուսանողների հետ միասին Աշոտ Բաղդասարյանը նույնպես մեկնում է հայրենիքը պաշտպանելու, 1944 թվականին զորացրվում է, ապա վերադառնում Երևանի պետական համալսարան ուսումը շարունակելու: 1946 թվին հաջողությամբ ավարտելով կենսաբանական ֆակուլտետը, նույն թվին աշխատանքի է անցնում Հայկական ՍՍՀ ԳԱ-ի կենդանաբանական ինստիտուտ, նախ որպես լաբորանտ, հետո կրտսեր գիտաշխատող: Մեկ տարի զբաղվում է ջրային անոռնաշարավոր կենդանիների ֆաունայի ուսումնասիրությամբ, ապա հիմնական ուղղություն է ընտրում տզաբանությունը: Այստեղից էլ սկսվում են նրա գլխավոր հետազոտությունները: Նա հիմնականում ուսումնասիրում է գյուղատնտեսական կուլտուրաների և անտառային բույսերի բուսակեր տվերը, դրանց էկոլոգիան, մշակում պայքարի միջոցներ գյուղատնտեսական կուլտուրաների լուրջ վնասատուների դեմ: Նրա նախնական հետազոտությունները վերաբերում են Հայաստանի տնտրանիխոյի տվերին, որը և որպես դիսերտացիա հաջողությամբ պաշտպանեց 1952 թվին և որը, իբրև Հայաստանի ֆաունայի հատորներից մեկը, լույս տեսավ 1956 թվին: 1958 թվին նրան տրվում է ավագ գիտական աշխատողի կոչում: Այնուհետև Ա. Տ. Բաղդասարյանը շարունակում է զբաղվել տզերի մյուս ընտանիքներով, որոնք մեծ հետաքրքրություն են ներկայացնում գիտության համար: Նրա ուսումնասիրություններն ունեն ինչպես տեսական, այնպես էլ կիրառական նշանակություն: Նա հավաքեց արժեքավոր շատ նյութեր, որոնց մի մասը մնաց դեռևս անմշակ: Այդ թվում նկարագրեց գիտության համար նոր տեսակներ: Ա. Բաղդասարյանը հրապարակել է շուրջ 34 աշխատություններ, որոնք ճանաչում են բերել նրան ոչ միայն մեր հայրենիքում, այլև նրա սահմաններից դուրս: Նա իր կյանքի ու գործունեության ընթացքում իր գիտելիքները անմնացորդ տվեց իր ժողովրդին: Ա. Բաղդասարյանը պատրաստել է Լյադրեր, որոնք ներկայումս աշխատում են նրա լաբորատորիայում, շարունակելով նրա գործը:

Ա. Տ. Բաղդասարյանը ՍՄԿԿ անդամ է 1947 թվից, երկար տարիներ եղել է ինստիտուտի կուսակցական կազմակերպության քարտուղար, հանդիսանալով լավ կազմակերպիչ ու սկզբունքային կոմունիստ։ Նա ազնիվ ու բյուրեղային մարդ էր, օժտված լավագույն հատկություններով, լավ գիտնական ու քննիչ և միշտ վայելում էր կոլեկտիվի սերն ու հարգանքը։

Ա. Տ. Բաղդասարյանն իր կյանքի գիտական գործունեությանն ամբողջությամբ անց է կացրել ինստիտուտում։ Նրա հիշատակը միշտ վառ կմնա նրա քննիչների, բարեկամների ու կոլեգաների սրտերում։

Գ. Դ. ԱՎԱԳՅԱՆ